



周家口張勇烈公祠碑

同治五年十二月

記名提督廣西右江鎮總兵捍



張公樹珊擊賊於湖北德安之楊家河東岸窮追深入至新家
開賊分路衝斷後隊遂陷賊陣死之今直隸總督合肥相國以

聞 天子震悼命從優議卹加恩予謚其廬州本籍及立功

地方均著建立專祠所有隨同陣亡之將弁並準附祀嗣曾文

正公復請於周家口為樹珊建祠 允之尋 予謚勇烈 賞

騎都尉兼一雲騎尉世職七年擒匪蕩平 上追念前勛 賜

祭一壇合肥相國疏請 賜宮銜奉 旨加贈大子少保銜時

則廬州本籍專祠已建而周家口之祠延至同治十三年始克

鳩工庀材公之五弟 記名提督樹屏董其事越明年光緒紀
元乙亥九月落成糜金錢若干緡棟宇輪奐廟兒聿新卜吉奉
粟主入祠官紳致祭者踰、濟、於庭陳之人聞風而至數百
里外扶老携幼踵接肩摩恍若覩風車雲馬之自天而下也淮
軍有四曰樹軍曰銘軍曰鼎軍曰盛軍皆起於合肥之西鄉而
實則樹軍首為之倡咸豐三年粵賊入皖 贈先祿公奉有司
檄團練鄉兵因命公與伯兄振軒中丞築堡於周公山下之殷
家畝峙糧儲械捍衛桑梓而同邑之劉省三軍門潘晴軒方伯
周氏昆仲兩總戎以及董梧岡總戎相與繼之百餘里內互為
聲援賊來則戰去則耕賊近則守遠則出擊閱四五稔西鄉得

以晏然無恐固皆公之功也厥初以親兵二十八人為軍鋒破
賊千生禽偽五尚書斬之由是以勇敢著名嗣率練助剿一起
壽春之急再解六安之圍迭克來安無為潛山太湖霍山三河
諸城隘而其勢益振遂應文正之募四軍者皆隸合肥相國部
下抵滬上為規復郡邑計公則有泗涇之戰清浦之戰新涇之
戰嘉定之戰四江口之戰福山滾營之戰無錫鳧河渡港之戰
江陰鏖壘焚舟之戰張涇橋破大輪船之戰茅塘橋拊背扼吭
之戰亭子橋一鼓登城之戰、無不利達於常州東南大局轉
危為安公之功亦偉矣哉援徐之後復隨文正剿捻北征文正
以公所部為親軍設四重鎮命公駐周家口扼回竄之賊嚴步

伍勤訓練聯堡寨安居民時豫中連年苦兵甚於苦賊樹軍至
則民皆感之公以逆蹤飄忽無定株守待賊終年未易一遇屢
以追剿請於文正許之鄢陵之役忍飢苦戰卒解徐圍豐縣之
役乘勝急追斬獲無算使賊不得渡運河而東復追賊汝甯由
黃岡以趨棗陽賊悍且衆或致書沮之公以湘淮兩部休戚相
關既為援師烏可徘徊瞻顧率所部疾進至德安乃罹於難讀
合肥相國疏公死事狀謂有古名臣風所部在淮軍中人數最
少曾求增馬隊三千誓圖滅賊以缺餉未允竊自愧恨而朝
廷既有忠勇過人之褒文正亦有仁愛惻怛之譽嗚呼公提步
卒四千義氣勃發所向無前南征北征足為諸軍之冠不幸捐

軀報國淮部主將如失手足各贖千金為公祠祀即鄂豫吾皖
諸大府罔不同聲悼惜親往祭奠厚贖以營其喪正不獨陳之
人聞公殉難為之巷哭紛營齋營奠聯名具牘公請建祠也
濬頭雖不獲見公得為中丞之屬吏又與劉軍門周總戎交習
聞公之戰績樂祠之成爰為表其勳烈而繫之以詩其辭曰
肥之西鄙無偽官三山峩、堅壘完大潛紫蓬胥以安追隨伯
仲為其難知公虓闕兩相國一偏裨耳拔之出以誠待人得死
力攘臂論功公獨默歸田未遂草裹尸濁霧迷漫楚水涓哭聲
震野天地悲衷中乾血猶漬衣公骨已寒名不朽忠正儀型傳
萬口來格來歆薦尊卣曰沙河仗公守如公勇烈有幾人白

馬首遁墮馬呻血性男子迴絕倫吹簫擊鼓歌迎神

廣東巡撫調署廣西巡撫李公神道碑

封疆大吏以縣令起家者習知民間疾苦地方利害與夫僚屬之賢否政令賞罰之是非得失一旦提綱挈領鼓舞而振興之則如樹表見景操縵成聲往、事半功倍不勞而理焉濬頭承乏監司十餘稔所見者惟山左李公其庶幾乎公與濬頭有三同道先甲辰同成進士同出倉少平師之門同官嶺南願其先乙未公舉於鄉濬頭則僅中副車迨釋褐登朝濬頭偉八詞館而公則捧檄於外濬頭觀察南韶時公猶權廣州守曾幾何時公由都轉而臬而藩洊躋開府先治八閩繼撫兩粵而濬頭則依然以老鹽官自粵之淮不幸於邗溝舟次哭公之喪傷何

如也嗚呼公下世已六年矣適公友嘉興陳君蔣松欲還浙濬
頭延之入幕暇輒與談公往事咨嗟不已曩未見公狀陳君乃
發篋出眎重感齊年交且相隨幾十稔謹次公生平書於麗牲
之碑而為之銘曰公諱福泰號星衢濟甯州人高祖學孔以貢
貢教授鄉里曾祖浩祖萬松皆有隱德考崑砥行力學屢試不
售慷慨持大節里人咸服之四代以公貴追贈如公官妣張太
夫人生子二公齒居長年弱冠補弟子員迨成進士以知縣分
發廣東粵俗號難治贈公訓之曰地方官患不清正清則人畏
正則人服畏且服彼粵民方效順輸誠之不暇尚何强悍之足
云吾族無顯宦而家世清白祖訓具在爾其勉旃公誌之不敢

忘歷知饒平潮陽番禺三縣事為政以安良除暴為先粵中風
氣大都匪強紳弱公毅然扶正抑邪力去吾民之害遇械鬪案
則必緝正凶誅首惡然後審兩造之曲直而持平以斷案無留
牘宰三邑皆然人心悅服公又以粵民趨利而不知有義欲端
民風首在正士習每見士子輒諄：於義利之辨勗之以敦品
勵行一時爭自濯磨蒸為善俗上僚咸倚重之咸豐四年五月
東莞會匪何六倡亂於石隆東莞故有巡船素稱敢戰縣令馭
之非法遂叛而投何六陷東莞距廣州僅一日程省垣為之震
動公時宰番禺稔知省河巡船與東莞巡船有隙屢在外洋私
鬥以之擊賊必得力且不煩征調請於當道從之連戰皆捷七

日而復東莞夏杪會匪復四起西則陳開踞佛山鎮北則甘先
踞佛嶺市南則陳洗滄陳險涼踞沙灣艾塘各擁衆十餘萬窺
伺省垣惟東面鹿步司一路可通薪米入城而其地向有土匪
甘陳諸逆嗾之相應遂成合圍之勢先是有爭水互鬥案旋息
旋闕民不聊生者已逾廿年公親至其鄉開誠勸導集紳衿耆
老為之理處民皆罷鬥感公恩恆思效命至是公乃設局於城
外東山寺曉以大義僉曰如公約一鄉通賊衆鄉擊之以孝廉
馬汝泉主其事期於每月朔望會集以聯官民之氣人心大定
賊恚甚急攻之並屯大隊於南海神廟奪我要隘均為鄉團擊
走之東道不梗轉輸相繼卒得成功甘先之踞佛嶺市也鄉民
從之賊張甚我軍屢挫公招北路紳士之避亂居城者告之曰
賊固烏合焉能成事若子弟聞多從逆事平皆族矣諸紳愕然
問所以自全之策公曰逼脅為逆許以自新其速傳諭子弟回
鄉勿助賊由官給以保甲牌先回鄉者註名於牌俟日入村收
捕凡牌內有名者皆勿散衆曰唯唯而賊勢瓦解我軍克其巢
甘先竄湖南破郴州復為楚軍所敗率殘賊三千餘折回鴉湖
脅各鄉復起事無應者當是時公以三千人屯慕德里大府以
鴉湖匪多且罪魁必盡殺公力持不可大府怒下劄嚴斥之同
事者咸惴惴勸公變計公仍持前議謂各鄉之不肯應賊者以
先有逼脅勿殺之言也今若食言鴉湖縱無足惜脫數百村反

側各路逆首復從而煽之是堅其從逆之心而驅之使合已不
遵功令罪也遵之而變生罪更大不待再計矣徑召紳耆復申
前約予限捕賊無不歡呼用命計先後縛送逆犯三千餘名如
偽元帥甘先偽樞密曹汶升偽五營大將曹春林等咸寘之法
北路肅清鴉湖丁壯萬人胥賴公一言全活之化互鄉為仁里
焉六年洋人申入城之請當道拒之因而構釁九月二十五日
洋船闖入省河攻外城、破十餘丈公以米籬實泥沙塞其缺
礮不能入退營海珠臺以開花巨礮向城轟擊晝夜鼎沸公請
於大府募敢戰士四百人駕小艇夜擊之臺高艇低臺上之礮
不能及艇而我艇小礮向臺擊之無不中者十二月二十三日

夜我軍出隊連環轟擊三時之久直抵臺東勇目闕龍率十餘
人攘臂先登洋人乃由臺西遁去翌日洋船退出省河居民安
堵是役也官弁出入火先中兩月有餘公常駕小艇督戰礮數
及於頂絕無所傷七年西北兩江有事兵勇紛、遣調省中惟
林福盛勇九百屯北郭外鄧安邦勇七百屯東郭外官紳議曰
外洋兵退已久可以議和大府不聽伍某又請勿令入城祇於
城外設公所公使來則督撫出城見之提督來則司道出城見
之領事來則守令出城見之不聽十一月偵知英法兩國合師
來犯請增兵不許請調鄉團不許兩國師船揚帆直駛十一月
十三日黎明以大礮轟城步隊六千撲東門鄧勇七百禦之戰

甚力自卯至午傷亡過半不退二更入見大府許以撫標兵八百助戰十四日兵未出而英人已蟻附登陴紳士請議和沆無成說公乃與南海令華廷傑潛約王太常映斗許太史其先林觀察福盛梁孝廉葆訓號召鄉團為規復計十二月初六日會於石井之蓼采鄉各路來會者數百人是日定議開局於石井傳檄省外十二縣諸大紳皆許之卒以和議格不行八年粵賊石達開由閩竄粵陷嘉應圍興甯總督某調卓興一軍赴援自駐龍川督師卓軍獲勝解興甯圍賊棄嘉應趨船塘墟去龍川八十里賊衆我寡謀報賊欲犯惠州前廣西按察使張某請制府迅返惠州以顧根本公力沮之制府不能決公進言我軍雖

單而賊蹤靡定應伺其動而疾擊之若大軍遽回惠州軍心一搖不可復振賊大股踵至何以禦之乃止逾數月謀報賊走河源一路頭隊先發令卓軍進屯順天湖以截其前何雲章一軍由李田追剿前後夾擊賊大潰竄韶州我軍復感之於河賊由連州入廣西同治三年偽侍王李侍賢由江右撲南雄時公已擢廉訪大府奏請以公督辦東北兩江軍務各軍咸屬焉賊攻南雄不克沿粵邊入閩襲武平永定進踞漳州偽康王汪海洋踞南靖公督方耀鄭紹忠各軍擊破之先後收復武平永定以功賞戴花翎四年正月奉旨馳赴潮州督辦潮防尋擢粵藩仍治軍事公以嘉應相去數百里難兼顧請派員分辦嘉防

大府不許二月行抵三河壩賊首丁太揚全股下竄扼之於楓
朗賊竄平和進陷詔安乃以鄧勇三千營黃岡之分水關禦詔
安賊連戰皆捷賊回竄永定下詔安潮防以固而康逆與花旗
林逆兩股已由上杭之大沽灘渡河入嘉應界方康逆之攻大
埔也方鄭兩軍禦之三戰三捷康逆退侍逆復來及侍逆退鄭
軍回大沽救鎮平破花旗於慈谿康逆踵至圍之數日鄭軍大
創鎮平為康逆所踞花旗亦由平遠大柘雉鷄籠襲踞長樂遂
分股踞龍川之赤岡公由潮抵嘉應議堅守州城以精銳先清
龍長之匪龍長清然後合力以圖鎮平卓軍圍長樂日以大礮
轟城賊乞降鄭軍攻赤岡亦乞降許之花旗反正者共四萬餘

人方謀安插遣散而康逆為閩軍所敗由龍南定南走江西遂
下鎮平長樂方鄭兩軍出境追剿卓軍移營龍川和卒之交以
防回竄嗣鄭軍赴援南雄方耀以追剿不力褫職公所恃者惟
卓鄧兩軍卓興又以索餉觸大府怒撤其軍欠餉六十餘萬責
令捐輸士卒譁然幾生變而公亦被劾交浙閩總督今湘陰相
國查辦疏入奉旨以道員降補賊旋由龍南回竄連平之下
坪墟有為公畫策者請以軍中實情白相國即回廣州聽候查
辦大局已不支何自苦為公不答既而曰連平為廣惠門戶我
不可以負人遂督鄧軍兼程進方軍亦繼至擊走上坪之賊
瞰卓軍既撤由間道襲嘉應踞之公聞警往援省餉久斷諸軍

奔馳窮谷中掘薯而食冬無棉衣朔風粟裂死相繼無退志
亦無怨言相國移師松口檄粵師防西南兩路即以方鄭兩軍
營南口防西路鄭軍自韶來營長沙防南路閩中江右各軍亦
陸續到防十二月十九日賊撲南口我軍鏖戰賊大潰閩軍乘
其後礮斃康逆餘賊棄城遁各軍殲之豐順山中嘉應克復粵
賊盪平五年正月至松口謁相國督牧令籌策善後事宜二月
全軍凱旋初咸豐七年冬贈公卒於家公乞奔喪大府奏請奪
情留粵遷延十稔公以軍務告竣請假回籍補制行有日矣尋
奉旨馳赴潮州辦理中外交涉事宜是年秋復補粵藩十一
月拜福建巡撫之命由粵入閩途中商民環訴抽釐兩起兩

驗共抽四次民不堪命下車之始首議減釐二成商民稱便偕
吳仲宣制府劾福州延平兩郡守吏治肅然閩俗最惡者火葬
溺女二事屢戒不悛公謂文告之詞未必家喻戶曉因刊小冊
萬餘本於監臨鄉試散卷時人給一冊令回鄉勸諭並商諸在
省巨紳籌款助葬育嬰民風丕變兵燹後田畝荒蕪賦額久絀
前撫臣奏請清理田賦糧戶慮追舊欠復業者鮮公請以懇復
之年起征舊欠悉予豁免於是逃亡者乃陸續歸業閩省距京
師遠公車費不貲以故赴試者寥寥中額日減公為集巨款僱
火輪船載士子四百餘人航海入都七年春闈獲雋者二十二
人蓋前此所未有也是年冬調撫廣東公籲懇入覲並重申

補制之請得旨俞允八年入都陛見後即回籍持服百日航海抵粵公以粵東風氣漸歸樸厚獨潮州九屬強橫如昔欠課累、歷任有司寬嚴未得其當又罕能廉潔自矢以為民表率者因偕制府瑞麟公奏派方總兵耀及候補道沈映鈴吳贊誠督率弁兵周歷各邑村莊清釐化導手訂章程八條曰別良歹曰禁需索曰絕械鬥曰散會鄉曰查私抽曰清田畝曰明賞罰曰許自新諄諭官紳實力辦理牧令則簡廉能者撫字催科并行不悖甫及二載閭閻靜謐比戶可封於是朝廷百十萬正供輸將恐後而水陸諸軍待支餉糈補發無虧說者藍鹿洲治潮普兩邑未能如今日布化之速也九年冬調署廣西巡撫

公母張太夫人年已八十有三灘河險阻艱於就養公命冢孫世昌侍太夫人居廣州公抵桂林整飭邊防翦除伏莽減高釐以甦民困裕餉楮以固軍心昕夕講求不遺餘力蓋無異於當日之治廣管也十年三月二十六日薨於位享壽六十有五公原配楊夫人繼配朱夫人咸豐七年洋人入城之變夫人在番禺縣署聞民間訛言投繯殉難請旌於朝筮室張恭人孔孺人子五家麟候補員外郎楊夫人出先公卒家桂家鳳朱夫人出均殤家玉候選主事加員外郎銜家蘭皆張恭人出女五長適孫次適張三適郭皆朱老人出四字孫五未字皆張恭人出孫一世昌孫女二均家麟出公以某年月日葬某

銘曰我筦禺筵步公之後百無一能鈇捫是守公治軍旅我攝
公篆竭蹶將事不匱輸轉公之服官廿有八年奔馳戎馬遭際
迍邐公向我言援枹痛哭一著棋輸致壞全局不戰不守身為
國辱鯨鯢沸波至今流毒我服公量汪、若海我服公行平、
如砥我服公才恢、有餘我服公功謙、不居名聞九重多
薦公者蹶而復起公心彌下公之愛民自始至終公之律已有
約無豐同譜一人公掌封圻老母在堂駢驚奚歸前李後朱望
垂東粵公也繼之民無異說惜乎暮年乃秉節鉞千秋萬歲請
觀此碣

河南巡撫錢公行狀

公姓錢氏諱鼎銘字新之號調甫又號定舫先世由海虞遷居
太倉之湖川塘遂占籍焉四傳至桓前明進士官南贛巡撫高
祖渭曾祖文蔡皆太學生祖鳳孫附監生鄉飲大賓父寶琛嘉
慶己卯翰林累官湖南江西湖北巡撫三世 誥贈資政大夫
高祖妣氏張氏郁曾祖妣氏楊祖妣氏聞均 誥贈夫人母夫
人三皆氏陳公兄弟二人齒居長道光五年七月初七日生幼
穎異有夙慧隨資政公官滇浙江楚開戶讀書不染貴介豪華
之習少長即留心經世之學於帖括外取歷代史鑑名臣言行
參觀互證酌古準今務為有用蓋其蘊蓄者深已甲辰補博士

弟子員丙午舉於鄉先是資政公於辛丑引疾歸田公日聞過庭之訓所學益進庚戌會試報罷直資政公以宣宗成皇帝升遐入都叩謁梓宮禮畢即擬還鄉因其鄉人陳刺史招往冀州避暑乃命公留京師以朝廷將考試中書迨六月考取景山官學教習延及仲秋中書尚無試期公遂赴冀州侍資政公南旋咸豐癸丑粵寇陷金陵資政公奉命辦理團練及勸捐事宜公左右贊襄動中窾要甲寅選贛榆縣訓導乙卯四月之任官廨故湫溢歲久傾圮來司鐸者咸僦屋以居公損貲修葺之以儒官責在造士凡諸生請業者必勉之敦品勵學寒畯則資以膏火與邑宰分期課試抉擇詳慎蒞任數月士論翕然

丙辰計偕北上以公之妻弟陸修撰增祥分校禮闈例應迴避不得與試乃援例報捐主事籤分戶部湖廣司行走丁巳乞假歸省戊午冬復計偕北上瀕行資政公謂科名有定得失聽之勗公立志為人勿以庭闈為念脫不售庚申試期伊邇不必歸也已未七月資政公捐館舍公聞赴星奔旋里哀毀幾絕經營喪奠如禮亡何蘇松常三郡為粵寇所陷公挈孀屬避居崇明嗣太倉亦陷吳中官吏自大府以下皆退保上海蕞爾彈丸三面受敵其勢岌岌不可終日而欽差大臣兩江總督曾文正公方駐軍祁門去滬上千里烽烟隔絕羣議欲轉危為安非遣一介之使乞師不可於是團練使者侍郎龐公鍾璐中允馮公

桂芬偕致書曰滬上一隅之地關係大局設再不守則東南半壁無尺寸乾淨土當此之時誼關桑梓為民請命成敗利鈍固所不計也且資政公遺愛在楚曾營多楚材是役微君孰能肩之公得書即駕扁舟抵滬上與當道議先籌餉而後乞援乘火輪船由海門入大江、面賊卡林立驚濤駭浪之中火光燭天飛礮如雨同舟者皆變色錯愕公則兀然不動卒達江北至安慶謁文正公備陳江左顛危狀請迅發大兵以解倒懸至糗糧芻茭軍旅所需某躬任之反覆數千言聲淚俱下文正始以瀕海小邑籌餉綦難思為持重之計願聞公言慷慨欵欵激厲士卒遂允所請今直隸總督合肥相國率淮軍三千人南下水陸

並進公則轉輸餉銀二十萬兩迎師到滬添募壯丁製造軍械並連和諸將効臂指之助克奏膚公同治初元壬戌奉江蘇軍營差遣之命九月以直隸州知州即選賞戴花翎癸亥二

月以知府分省補用甲子九月擢升道員加按察使銜並賞

二品封典丙寅八月加布政使銜時合肥相國督辦直東豫皖軍務命公於袁浦轉運餽饌勤勞備至相國深倚重之己巳文正移督直隸疏論人才謂公才大心細堪膺重任請調至畿輔差遣得旨先行合肥相國方移督湖北公於五月赴鄂面籌善後事宜適奉補授直隸太順廣道之命九月抵保陽即聞所轄地方旱灾謁文正請於涖任後辦理荒政文正聽之公沿

途訪詢民間疾苦接見屬僚議及賑貸僉以抽辦則易生缺望
徧給則艱於籌款且恐鄰屬因之藉口有礙徵收率遲疑莫決
公則謂司牧者目覩旱災瞻徇顧忌來歲青黃不接之時民生
將何以堪遂以仲冬巡閱為名周歷三郡二十六邑體察實情
確知廣平府屬之肥鄉廣宗成安及永年昆連肥鄉之數十村
莊並大名府屬之大名元城等七州縣旱歉最重寓賑於貸請
文正奏撥天津練餉項下制錢十萬以供撫卹十一月擢直隸
按察使奏請 陛見得 旨俟畿南賑務辦竣再行來見公遂
密飭肥廣等州縣借編查保甲將極貧次貧戶口分別註冊以
便來春委員覆查詳定章程刊發春貸票示一律遵行既而春

旱尤甚道署西偏之龍神祠素著靈異公虔誠祈禱立沛甘霖
公書靈貺畢臻額以答神庥焉捐奉增設大名府義學令校官
按月赴塾考核有秀美出羣者資以膏火改舉節孝章程由學
申道請於大府援卞京兆寶第新章由州縣逐詳督學兩院即
予會題以免濡滯庚午三月賑務告竣則已奉總督春貸免還
告示張貼通衢頌聲大作公旋入 覲 召見二次垂詢周詳
履按察使任而天津民教案起文正奉 命赴津治其事公先
上書請調銘字營一軍駐滄州隱為備禦厥後天津守令幾罹
不測公又力保全之八月擢直隸布政使公家事煩重難了往
往延閣吏得因緣為奸公則分為最要次要日行三種專委勤

幹之員限日清釐積弊為之一空直隸十年九旱通飭各屬開井種桑大資民利是秋北河漫溢請大府奏撥司庫二十萬金賑被災最重之津靜滄清四州縣其次河間等十三州縣分別撫卹又次各屬酌量蠲緩手定章程十條一嚴覈戶口二慎選紳董三赴津運米官給價值四以銀易錢俾便行用五先期給票以便稽查六擇要設廠以均遠近七留賑款以備春荒八興工作以資備趁九酌給紳董經費十嚴定委員賞罰皆因時制宜實事求是順德之洺河歲久淤墊公捐廉為倡集資疏濬全河一律通暢農商均被其澤尤於用人理財諸大政加意講求凡所甄拔率皆賢俊清釐州縣交代詳請戶部照給留支並撥

抵鈔票全行蠲免下僚罔不感恩思奮十一月擢河南巡撫因賑務未竣於壬申二月甫卸藩司任入覲 召見二次三月

陞辭出都道保陽句留旬日僚屬餽饌凡二萬餘金悉卻之四月履任中州道府州縣在省垣需次者凡四百餘人公排日分班接見兩月而畢不特姓名年貌並其性情言行皆能默識而區別之量材器使衆心悅服時固始賊李六陰結捻匪餘黨起事公遣將弁疾馳扼之一戰而潰首要各犯就擒因慮南汝先地方向為盜藪捻患十餘年始息而廢壘尚多易滋伏莽乃命各州縣毀圩砦嚴緝捕仿直隸章程選綠營馬步驍健者訓練之更定營制厚其餉糈年十五以下二十五以上者乃編入

籍簡樸誠勇敢無習氣之將弁統之先練四營續增為正副九營分布要隘俾成勁旅更番巡邏如南陽府屬之賒旗鎮馬山口板橋川茅草垵李官橋青華穰東饒良鎮李青店汝甯府屬之翰東集明港驛斗溝銅鐘寨五溝營出山店新安店光州屬之淮鳳集黎家集期思集白菜園皆長年駐巡佗如陳州府屬之周家口許州屬之襄城縣汝州屬之嵩宜永各山隘陝州之閿靈屬之界連江皖各縣河南府屬之嵩宜永各山隘陝州之閿靈大道及河北彰衛通衢皆往來撥隊量其緩急而定多寡巡已即練已即巡兩無偏廢於是豫南盜賊次第肅清亦仿直隸奏定章程拏獲訊明即行就地正法三年殲盜首數百其尤著

名者為滑縣之馬勞幫仍飭通省州縣力行保甲以清盜源頒發條規令各因地制宜斟酌損益遂爾著有成效興修水利浚賈魯河使通舟楫靳脗河則易名勺金若丈八溝清河餘濟河天然渠永豐渠等處咸施畚揭凡有溝洫之利者七十餘州縣罔不疏通委員勘驗無誤初資政公守歸德日曾於城南開河以資農田灌溉土人號曰錢公渠歲久淤塞幾成平地公以巡閱營伍至歸德紳民請復渠乃倡捐興工兩月而渠復勒碑紀之河北之淇縣河內厥地宜稻居民不解種藝乃仿江浙水車製造頒給新闢稻田二千餘頃為河北從來所未有軍興以後倉穀無存厥座坍塌乃仿方恪敏公遺法勸民積穀於城鄉分

建義倉有司擇公正紳耆董其事不假手於吏胥計通省積穀
九十三萬石荒歉足以為備州縣私設班館羈押人犯胥吏凌
虐死於非命者不知凡幾公則以廉明公正者派司察訪使命
相銜互為糾考而委員之賢否牧令之勤惰勸懲交盡奸蠹莫
容已南陽鄧州多溺女之風為設保嬰局官覓乳媪養嬰五歲
仍歸其父母通省皆仿行之省垣孟子祠左建遊梁書院令各
省官幕子弟肄業其中巡撫司道府縣輪流月課制藝而外兼
及經古優給獎賞拔取真才鄉試人數驟增疏請添派同考官
二員並添建號舍數千間士林尤為稱頌又以中州多理學名
儒令各州縣修葺先賢祠墓訪求遺集歲時存問其後裔孟津

河溢衝齧漢先武陵亟請於朝於鐵榭寨添拋石壩以資保
固兼於上南中河兩廳黃河工程加拋十餘壩堵禦急溜山東
石莊戶河決巡撫丁公寶楨駐工親督合龍公助以運糶之船
應期而至旋以糶料不足方欲派員四出采辦公聞之即委員
分赴蘭儀考城等處幫同購買並將下南廳本年預儲糶料借
用一百架大舸連檣而下決口即日合龍丁公以公力顧大局
聞於朝嵩毅兩軍調援甘隴公以道遠提前三月趕解用是
數年以來甯夏肅清肅州克復關內盪平公性耐勞遇至難之
事殫精竭慮反覆籌維必期於有濟而後已接見屬吏諄諄誠
勉以聽斷緝捕徵解三事為考察闡葺廢弛者立黜之故撫豫

三年吏治日有起色甲戌十二月 穆宗毅皇帝龍馭上賓公
北向哀號終日涕淚不乾飲食頓減頽體素豐碩理案牘不少
休會歸德衛輝所屬生蝗嚴飭撲捕發款收買蝻子解省呈驗
仍慮未能淨盡復刊錢薌士方伯捕蝗要訣一書頒行各邑重
念時事多艱受 恩深重無以報答涓埃憂思過甚火鬱於中
遂患瘍證時奏調總統毅軍四川提督宋公慶回豫駐閩潼一
帶控制中原腹地隱為深遠之圖疏入 報可及宋軍至潼關
而公已寢疾矣五月初三日項右微腫了不介意眠食如常初
七日猶至箭道校射而所患遂劇迨初九日醫者投補託之劑
不效胸膈脹滿四肢如火灼復現斑疹改投清解之劑少進飲

食而病勢屢變二十日自知不起甫具摺請假而薨享年五十
有一公配陸夫人先公卒繼配陳夫人側室吳氏子二溯者優
廩貢生內閣中書溯時附生皆以軍功加五品銜 賞戴花翎
女三長適翰林院編修陸繼輝次適嘉定附生廖壽鏞三適丁
卯科副榜汪增懷孫三繹槃溯時出綏槃溯耆出繩槃溯時出
孫女一公之遺摺到京奉 旨照巡撫例賜卹 賞溯耆主事
溯時舉人嗣東河總督曾公國荃以公當日請師一舉闕繫東
南大局安危疏請將公生平政績 宣付史館從之公天性友
愛與弟鼎銘家居朝夕切磋道義風雨聯牀怡然至樂及持節
中州命猶子溯灝來署讀書公訓子妣輩曰士先器識而後文

藝立品立身實人生第一要著斯為善守先業不在區、詞章
記誦之末也尤篤於友朋之誼事無巨細必為之盡力圖維故
公薨之日遠近聞者咸為泣下云資政公與先叔祖采卿公為
己卯同年濬頤久親欽德範公之乞師於文正也至安慶館於南
陵徐觀察文達寓所時屆隆冬公冒雪而來日作包胥之哭義
形於色觀察親見之以為人所難能也觀察為濬頤歷、言之
恨不得一見公、撫豫時有書至意甚拳、公之匱至揚州濬
頤往哭於舟中公子溯耆溯時持所編公之行述浼觀察乞濬
頤作狀謹條次如左以待世之有道德而能文章者采擇焉

葉辰生墓表

道光丁未會試濬頤膺分校之役得士十三人乃不二十年帥
逸齋太史殉難江右黃子春太守殉難蜀中而辰生則以湖南
縣令殉難於其鄉里予在嶺南有昔年校士得三忠之句蓋紀
實也逸齋死難事不知其詳予過黃梅訪其孤又不得見子春
則從駱文忠公轉戰入川所向有功奮不顧身遂罹於難文忠
專疏請 卹並撫其事蹟宣付史館獨辰生殉難鄉里僅一見
於邸抄佗無所聞也同治甲戌孟春予至吳門辰生之弟薇史
明府來謁詢其兄死難事能言之迨仲秋薇史過邗上告之曰
予與哲兄忝附文字交子盍書狀予將表其墓焉薇史諾之未

幾返吳門而以書抵予並寄狀至按狀君諱維蕃字价人號辰生姓葉氏松陽人曾祖某祖某父秀發增貢生母包氏生子二君其長也次維垣即薇史君幼而穎異十三歲能文章十八歲補博士弟子員歲科試輒高等旋即補增食餼壬辰舉於鄉癸巳丙申應禮部試皆薦而未售戊戌挑取國史館騰錄癸卯丁母憂哀毀骨立喪葬盡禮丁未成進士以知縣用分發湖南攝桂陽縣篆才八十日而民感其德有八旬澤溥兩袖風清之譽繼權黔陽稍久民之誦德者一如桂陽之民也庚戌丁父憂雞斯徒跣扶匱回里自是家居不出直東南軍事起在籍以勸捐出力大府奏獎加知州銜咸豐八年粵匪陷松陽君馳往杭州

痛哭乞援於大府發利^兵剿賊克復縣城當道咸重君命隨同有司辦理善後事宜十一年賊又犯松陽君偕處州太守李公希郊督師於東鄉與賊戰我師不利君與李太守咸罵賊不屈死之君歿時面目如生年甫五十七歲葬於城東西山郊向迨同治六年浙江巡撫馬公新貽以事上聞贈道銜予雲騎尉世職君配毛氏側室傅氏生子二振綸太學生襲雲騎尉振綬女二長適色次適闕薇史又言家於城中賊踞城久君之生平著述散失無一存者猶憶丁未揭曉後君執贄修弟子禮來謁予見君端謹樸慤喜其為砥礪廉隅之士一行作吏必能不負所學克底循良乃設施未竟以憂去官躬際阡危鄉邦多難不圖

二知軒
以孱弱書生慷慨請纓捍衛桑梓大兵一至蛇豕駢除引重上
游駁、將可大用乃劫運未完再櫻鋒鏑捐軀報國視死如歸
君之殺身成仁固與逸齋子春不媿三忠之目也嗚呼今者距
君殉難之日已十四年矣何幸得見薇史俾白頭老友泚筆以
傳大節而勒貞珉焉九京有知庶幾英靈少慰也歟

汪芝生師墓表

濬頤年十四歲應郡試其時太守為吾師芝生先生拔置第三
院試得補博士弟子員是濬頤之忝竊科名師實導其先路顧
以童稚弗獲趨承訓誨垂老徒深仰止之思同治己巳濬頤承
乏兩淮筦鹺政師之長子龍溪少尹來因留其襄理淮南書局
事溫文爾雅有世家風閒詢吾師生平宦蹟龍溪黯然曰先府
君見背時元魯年才十一弟守愚甫九齡昏蒙不能繼述抱恨
終天僅就當日記憶所及者具狀以丐表墓之文濬頤受而讀
之其狀曰府君諱霖字星南號芝生姓汪氏為邑望族曾祖上
墳雲南大理府知府祖孟鎬吏部文選司主事父如藻山東督

糧道母朱恭人繼母戴恭人府君以附監生嘉慶辛酉登賢書
官內閣中書舍人充 文淵閣檢閱歷任山東濟南府武定府
同知權東昌武定登州府事所至有政聲以大計卓異擢安徽
廬州府知府調鳳陽府知府兼權廬鳳潁兵備道原配朱恭人
繼配顏恭人側室楊孺人生子二府君以道光十一年十一月
二十七日卒於官年五十八歲葬於嘉興西鄉之梅家兜母氏
皆附焉府君天性孝友同胞兄弟十一人多早逝每歲必籌千
餘金以分贍孤寡族中有不能讀書婚嫁者悉俸助之廉俸所
入不專則減衣損食以行其志治獄仁恕御下寬和待人坦白
無城府僚屬有過面拆之不少瞻徇牧令之有才望者必為推

轂如舒蘇橋觀察朱恕齊方伯周文忠制軍皆府君所薦舉也
文忠任宿州以刑尚猛烈言官彈之事下大府按治方急府君
謂除暴所以安良剽悍之俗非嚴厲不足以懲之自周蒞宿強
梁斂跡閭閻夜不閉戶信而有徵安得指為酷吏耶力以去就
爭之大府感悟遂有愛民如子疾惡如仇之考而文忠由此大
用矣鳳陽地瘠民貧偏災時告 朝廷歲有振卹州縣視為具
文甚至藉口救荒那移他用府君痛除積弊務期實惠均霑任
廬三月即調任鳳陽六年以來水旱頻仍府君露冕襜帷僕、
無停晷故全活者衆僉以為召父杜母不是過也壽州安豐塘
即古芍陂為水利要區歲久隄堰崩墊府君率屬倡捐不費民

財俾復其舊工竣之日有鶴百餘翔集塘畔居民弋獻其二畜
之後堂因顏曰來鶴云他如定遠之沫河口太平橋皆以次修
復至今民田賴之府君並作記勒石以垂久遠境內產穀不多
府君見園中桑陰茂密稔知鳳之人向以織絹為業欲興蠶桑
之利商之觀察蔡公世松擬各捐數千金往市湖桑且募浙人
種藝以事出創始大府未即報可而府君適病其議遂寢近來
江北各郡半設課桑局惜府君不及見也辛卯冬霖雨民苦之
府君步禱感寒致不起彌留之際代者為恕齋方伯來眎疾但
以三邑飢民為念無一語及家事靈輻南旋過定遠境父老有
泣拜於道左者咸豐元年守愚以縣丞入都驗看道鳳陽留信
宿鄉里聞為舊使君之子爭來謁問逆旅主人堅不受直以此
見鍾離人情近古抑亦府君之遺愛在民也濬頤乃作而言曰
於虜吾師歸道山已四十年矣先大夫曩與吾師同官中書有
舊嗣以通家之誼交更篤過庭時輒聞先大夫嘖道太守之
賢茫然不解所謂今幸得交今子將有修墓之役臚陳善政俾
操不律以補埋幽之闕而永其傳夫豈獨為汪氏先哉凡二千
石有志於斯民者咸當引以為法也

師子岡阡表

嗚呼我顯考榮祿府君以道光二十八年閏四月十二日卒於定遠里第春秋六十有三長男濬頤時官翰林在京師聞赴奔喪八月抵里諸叔父告濬頤曰汝父遺命速葬前年即以所得師子岡新阡繪圖寄汝、宜從親志勿違緩也嗚呼痛哉濬頤敬從府君遺命卜葬於十月十九日並以庶母宋孺人薛孺人兩匱祔於府君之側依形家言午山子向兼丁癸時以期迫弗獲具狀諸叔父曰汝父手訂年譜將來可本之以表於阡忽、至今二十二年每念音容悲愴靡已惴、焉大懼府君之嘉言懿行湮沒不傳於世也謹按年譜府君以乾隆五十二年六月

十一日生甫六歲大母宣太夫人即見背大父繼配徐太夫人
撫之如已出八歲時讀爾雅至梁山晉望也請於大父曰成王
封叔虞為唐侯至子燮乃改國號曰晉爾雅先儒以為周公作
周公時安得稱晉耶大父異之十七歲補博士弟子員嘉慶戊
辰淀津 召試賞舉人一體會試援例捐內閣中書春闈屢薦
不售丙子以復校 高廟實錄獎叙選湖北德安府同知奉大
府檄捕獲習天主教犯三十餘人大府奏獎庚辰二月入覲奉
旨先換頂戴交軍機處記名五月擢浙江湖州府知府道光
辛巳正月右髀病疽危甚忽一夕夢曾大母陳太夫人坐榻上
掖府君身使之外向醒而霍然蓋府君素為曾大母所鍾愛故

有此夢云是年修碧浪湖浮玉塔以閤郡文風所係也壬午長
興四安鎮旱災請緩徵大府從之重修右文館拓東西號舍癸
未湖州大水烏程歸安長興德清武康五邑皆成澤國巡撫帥
公承瀛請振於 朝府君復勸五邑紳衿富民捐輸以補官振
之不足故事辦振必報分數吏胥因緣為奸民不堪命府君廉
得其弊破格以全災報駁而復請者再積迂某方伯幾登白簡
時張蘭渚先生家居語府君曰太守愛民吾鄉之福方伯則拘
於成例恐干部詰耳盍擇每邑稍近山鄉者區分數以合例餘
則概報十分可乎府君如其言事乃解甲申修復長興太湖石
塘七十丈有奇樹碑紀事乙酉因德清徐蔡氏案以檢驗錯悞

罷職戍軍台八月解組都人士繪峴南祖帳圖以揚德政表去
思焉丙戌北上至山東桃源以不由驛路詣縣、令某白諸大
府張皇入告奉 嚴旨究治而府君則已先期至兵部矣凡在
刑部獄十日部議改戍新疆直回匪煽亂督師揚威將軍長文
襄公知府君之才屬署伊犁將軍德英阿公以府君辦理漢字
事件奏入 報可時伊犁軍儲不足府君請署將軍奏大營停
運以實後路 允之適叅贊大臣容安公蒞任府君議廣置屯
田修河節費兩帥皆韙之惜不果行冰嶺高寒險滑曩以四城
不守徵調稽遲致有履勘改道之 命府君以冰嶺為適中之
地歸化已久佗徑則涉步魯特游牧之所野性難馴繹騷足慮
乞兩帥據實復奏遂寢其事又以慶祥公殉難回疆請入祀昭
忠祠伊犁文武員弁調赴南路死事者數千人並請入祀皆從
之七月四城克復叙功蒙 恩賜環戊子入關歸里時濬頤年
十四舉茂才大父母在堂府君偕諸叔父晨昏侍奉維謹課季
父及濬頤讀書教以懸腕中鋒香光執筆法府君性嗜書每日
晨起必至草堂臨元秘塔五百字求書者戶外常滿府君不以
為苦也壬辰大父棄養府君年已四十六歲盡哀盡禮戚鄰稱
之甲午於大母節孝坊後建支祠奉祀顏曰筠心堂丙申率三
叔父重修族譜丁酉以休甯故里三十三都鄣源村族人有盜
葬祖塋事府君親往族人聞府君將至畏罪將兩棺遷去至則

大會族人祭祠展墓留旬日焉戊戌大母棄養府君已五十二
歲哀毀骨立如喪大父時炎暑居廬疽發於背幾殆幸療治得
瘥壬寅鄣源遠祖澤三公墓側復有汪姓盜葬兩棺府君請於
有司令遷去而不科其罪甲辰濬頤成進士改庶吉士乙巳散
館授編修九月 召見詢父年齒濬頤以臣父五十九歲對
宣廟曰汝父年紀不大何以不做官濬頤以檢驗錯誤罷職對

宣廟曰此公罪也濬頤敬錄奏對語上達府君府君感 先

皇恩遇屬門下士歸安姚圻繪近光圖紀以二律府君前在伊
江箸東歸日記生還小草歸田後箸蔗餘偶筆古鐔于齋吟稿
撫松書屋唱和詩年譜至六十二歲而止後書自挽楹帖云時

至即行再休戀身外浮雲天邊朗月知足不辱問誰似殿前作
賦塞上從軍嗚呼痛哉季父告濬頤曰己酉正月汝四叔父先
以疾卒汝父悲惋過甚時覺胸膈脹痛日啜粥糜初以為胃弱
耳三月宗祠春祭猶扶病成禮嗣日加劇醫治罔效竟至不起
傷何如也濬頤迴憶官京師日府君每賜書必諄、以砥行立

名為戒自謂宦海風波屢遭危險幸而玉闕生入事親教子俾
得以成名汝當專心致志讀書中秘能耐清苦久之必晉坊階
慎勿違吾訓言別趨捷徑也嗟、言猶在耳予小子知識蒙昧
上負提撕乃以給諫轉外臺碌、毫無建樹浮沉禺莢者又逾
十稔祿不逮養抱恨終天嗚呼痛哉曾祖諱瑛 累贈榮祿大

夫曾祖妣陳氏 旌表節孝 累贈一品夫人祖諱玉達 累

贈榮祿大夫祖妣宣氏陳氏 累贈一品夫人庶祖妣龐氏

誥贈淑人府君諱士淦字濂舫 誥授朝議大夫 累贈榮祿

大夫妣楊氏生妣王氏 累贈一品夫人府君兄弟六人府君

居長子四人濬頤妻周氏妾謝氏朱氏周氏謝氏已卒濬孚庠

生妻林氏皆卒濬伺候選同知妻陳氏妾徐氏濬復庠生湖南

候補同知妻陳氏女二人長適吳次適孫已卒孫八人臻大庠

生甘肅平慶涇道臻鵬臻邁臻廣臻進臻德臻高臻善孫女八

人曾孫燕昭選拔貢生曾孫女一人元孫女二人嗚呼我府君

一生孝友忠厚然諾不欺師友之間勲拳肫摯視死如生有古

人風年譜雖畧載一二未足以盡之也吾家自大父時即號素

封迨府君與諸叔父析產分爨亦尚充裕府君則持躬勤儉冠

履不敝不易子弟稍染華奢之習即呵斥之不少寬貸族中有

行止乖禮法者見府君來皆引避遇有爭競之事聽府君一言

而決府君病革日家中兄弟子姪來視疾者環坐堂前屏息以

待不忍去也蓋由府君性情剛正處分家事毫無偏倚故為合

族所敬服若此濬頤自孩提至授室未離親側我府君教誨周

詳無微不至俸博科名以蒙光顯非仰承厚澤庇蔭烏能以有

今日哉濬頤大懼嘉言懿行之湮沒不傳於世也爰詳列世系

和淚濡墨並揭於阡光緒元年正月 賜進士出身翰林院編

修 誥授榮祿大夫布政使銜加一級兩淮都轉鹽運使男濬
頤表

之字河西阡表

嗚呼道光已酉濬頤奉先府君諱奔喪歸里十月敬安寔時

先妣楊太夫人多病兩目亦眇昏不能視物幸飲食如常人米

鹽瑣屑事必躬親不以為勞也濬頤私冀能得所恃愛日方長

迨庚戌春太夫人以濬頤官京師久債負甚巨屢趣之出遊為

屏當計濬頤揮淚別母勉強就道孰意馳驅數千里外不得家

中音耗辛亥甫自嶺南歸而太夫人已於庚戌十二月二十三

日棄養矣嗚呼痛哉壬子三月 日卜吉於之字河之西阡遵

遺命也太夫人為六安望族乾隆五十三年八月十八日生年

十八歸我府君曾大母大父大母均在堂侍奉重闈怡聲愉色

無忝婦職太夫人以堂上日望抱孫因請之曾大母勸府君納
吾母王太夫人為筮室生濬頤四歲而王太夫人即見背太夫
人撫之如已出濬頤兒時體羸善病太夫人鞠育顧復多方調
護之嗚呼觀太夫人之待予小子若此即知太夫人之所以待
予母已府君守湖州日太夫人以濬頤鮮兄弟又為府君納庶
母宋孺人生弟濬孚濬侗府君歸田之後太夫人又為納庶母薛
孺人生弟濬復及兩妹太夫人之撫三弟兩妹一如其撫長男
也遭翁姑之喪太夫人以冢婦率諸妯娌盡哀盡禮戚鄰稱之
太夫人主持中饋數十年善權子母雖食指浩繁而量入為出
井井有條從無匱乏府君戍伊江出曩在郡所積朱提四千以
為遠道之需嘗以日用所贏餘者別置一篋授吾舅氏在六安
近郊置田二區癸丑甲寅間粵寇土匪交訐吾家質庫蕩然無
存室廬灰燼濬頤將遷居肥上去年甫修家廟營宮室並為兩
弟謀栖止之所慟四弟濬孚早逝以六弟濬侗子臻高為之後
兼為置屋而即以六安之田二區歸之太夫人之辛勤居積澤
及後人凡我子孫皆當舉以為法焉濬頤自京師歸太夫人曰
吾老矣惟盼汝早得外官俾吾含飴弄孫以娛晚景吾復何憾
豈知孟浪遠遊罹此鞠凶兩年之間怙恃均失濬頤遂長為無
父無母之人已嗚呼痛哉太夫人相夫教子俾得成立而不獲
享一日之奉為子者之心固終其身不能安也濬頤不見吾母

逾廿年今已六十有一已追思往日提携保抱視衣視食依
如在目前苟弗稱述懿媿傳之子孫不孝之臯滋大矣嗚呼痛
哉太夫人以府君官湖州知府 誥封恭人以長男濬頤官兩
淮鹽運使布政使銜加一級 累贈一品夫人其世系已具於
師子岡阡表不再書光緒元年正月男濬頤表

之字河北阡表

吾邑之西鄉有河焉發源於靈惠橋自南而東至早祥廟折而
之北縈紆遶繞復滙注於東南形家所謂之旋水也先大父延
湖口周先生於家使覓吉壤於此卜穴埋潛記焉濬頤生四歲
吾母王太夫人即見背賴吾嫡母楊太夫人撫之如已出俾得
成立十一歲先大夫守湖州因案去官濬頤隨楊太夫人歸里
先大父教之讀書濬頤兒時尚不頑鈍先大父鍾愛特甚至十
二歲先大父命先四叔父率濬頤奉王太夫人匱卜葬於之字
河之北阡壬山丙向時則三月十八日也濬頤雖幼稚猶記畚
土成穴時得潛記之軌所書朱文絕不變色穴土純白潔堅細

臘無纖毫砂礫周先生語先四叔父曰如此佳城真郎君之福也戊子濬頤即舉茂才而先大夫亦賜環歸里乙未江南鄉試濬頤中副車己亥捷京兆甲辰成進士入詞館先大夫以王太夫人既安寤窆之後科名顯應若此亟書封墓文刊碑埋於墓側馳書告濬頤誌之勿忘濬頤既為先大夫及楊太夫人作阡表因思吾母之阡亦不可無表也躊躇久之四姑母告濬頤曰汝母高郵州人直大水來歸吾家年甫十三侍汝曾祖母陳太夫人性情婉淑動必以禮年十五陳太夫人命為汝父篋室年十九生汝年二十二即下世嗚呼痛哉濬頤有祿而不能養吾母有三子四女一孫兩曾孫女而不能博吾母堂上一日之歡

心生我劬勞昊天罔極尚何言哉尚何言哉太夫人以子濬頤官兩淮鹽運使司布政使銜加一級累贈一品夫人光緒元年正月男濬頤表

金匱縣知縣齊梅麓先生墓表

嘉慶十三年

仁宗睿皇帝巡幸淀津多士迎

鑿獻賦

名

試行在名列一等第二者為齊梅麓先生第五則先大夫皆

賞舉人嗣先大夫守湖州先生已罷宰金匱家於宜興濬頤兒

時竊見先生與先大夫尺一往還魚有訓唱歲時罔間迨先大

夫歸田之後課濬頤讀書於撫松草堂常為道先生政事文章

超越儕輩手一編授之曰此我梅麓同年詩也小子當取以為

法因迴環雜誦出入必置諸行篋尤喜讀紀實書壁諸詩以為

情真語摯仁人之言雖古循吏弗是過也每恨無緣侍先生左

右一親辟呬且以不得讀先生全集為憾同治八年來揚州先

生之長子學裘由滬上挈舟相訪驩然道故詢先生全集則欷
歔泣下曰板毀於賊家中僅存詩集十六卷耳遂鈔副本見貽
為之屏當資斧長作寓公與濬頤為詩友忽：七稔已先緒初
元仲春學裘持狀眎濬頤曰先公一生事蹟黃霽青年文曾為
作傳載於詩集之首而墓碣闕如學裘年已七十有三深懼遺
徽湮沒何以見先公於地下素稔年文與先公最為投分學裘
又追逐壇坫久乞吾子念兩世之交泚筆以光泉壤感且不朽
謹按狀先生諱彥槐字夢樹號梅麓世居安徽婺源縣唐末有
蘭公者黃巢之亂捍衛鄉里父子相繼爵上公遂為著姓祖松
贈奉政大夫父紳進士官至廣東嘉應州知州贈朝議大夫先

生生於乾隆甲午年十月十二日幼稟夙慧七歲即能文年
十四補博士弟子員從姚姬傳先生受作文法弱冠以詩謁隨
園老人驚為曠世逸才以遠大期之人謂沈約之遇王筠也嘉
慶甲子以優行貢成均學使山陽汪文端公器之以謂皖中才
人讓生獨步戊辰己巳聯捷成進士改庶吉士充 武英殿協
修辛未散館以知縣用初選直隸無極縣親老告近改選江蘇
金匱縣直大早創立圖振法以誠感人輸將踴躍得朱提一十
四萬有奇復勸殷戶糴米平糶饑民全活無算又以振餘造望
亭橋修泰伯墓大府上 聞晉知州秩庚辰以疾得告時祖母
曹太恭人母俞太恭人均在堂公於宜興郭內築雙溪草堂以

養親將有終為之志道光甲申隄決堰盱洪湖立涸汪文端公奉命往視南河先生謁文端極言引黃濟運之非上海運議文端入都告協揆英和公以議上 聞命兩江總督魏公元煜檄公辦理海運有以盜賊可虞風濤至險造船費巨用袋貯米咄嗟難辦多方尼之者先生謂吳淞口迤南由浙及閩粵為南洋迤北由通海山東直隸及關東為北洋南洋多磯島水深浪惡可畏非鳥船不行北洋多沙磧水淺礁硬非沙船不行洋盜在閩粵乘鳥船斷不能越吳淞以北爭南糧也上海沙船有三千餘號儘敷濟運無須別造沙船舵工熟於水線風信不然富商安甯以多貲造船挾重貨而輕於一擲漂沒間或有之鳥

得因噎廢食况春夏風濤較穩耶米宜散貯奚以袋為商賈載豆麥皆然也阻者語塞江蘇巡撫為陶文毅公悉如所議行是役也用船一千五百有奇運米一百六十三萬三千餘石銜尾而行源、抵天津無稍阻滯倪失咸服其識之審而謀之臧也卒之功成不居引身而退陶公力勸之出命權蘇州督糧同知勤估吳淞江親督浚治日行泥淖中不以為瘁事竣得 旨優獎以知府候補旋丁母憂遂不復士先生為文根柢經術能見其大研究天官家言發鄉先輩梅氏江氏未盡之蘊性巧而通直探微窈嘗製中星儀自動渾儀二器並著說以示用者又仿泰西水法造龍尾恒升二車其用一車當翻車之五人一當十

二
迅捷奔騰靡有滲漏林公則徐試之於塘、寬十畝深二尺岸
乾七寸視畧甫三刻林公奇之謂有益於農田水利欲以入告
未果先生有龍尾車歌可得其制深明地理謂山有直高有斜
高以步弓量之者斜高也以矩度測之者直高也婺源有冲山
舊志云三百二十仞先生用矩度墜線倒影測之知為斜高作
冲山記其他經世之文如論開濬吳淞泖湖劉河各事宜復林
公問勸民買米說與祭酒程公恩澤論鹺務諸書察覈形勢推
勘利病剴切周至無不盡之言惜乎未竟其用也雖退居林下
遇有關繫於國計民生者未嘗不拳拳於中當道倚之若昏夜
之燭指南之鍼先生固不行其道而行其志者歟先生本居婺

源梅源山下遂初之後僑寓荆溪輒歸里創義倉環村種樹引
水灌田以救貧乏修族譜立祠規諄於孝友睦婣垂為訓誡
以教族人至今遵守勿替性好山水笠屐所到輒摩厓題壁酒
痕墨汁淋漓衫裋間自言生平之將至奇至險者莫如登岱蓋
夜作日觀之遊甫及半嶺而雷雨交作山風怒號古木盡拔惶
遽間非遇茅棚嫗接引則危乎殆哉不堪設想矣讀先生紀事
詩猶令人神駭色變或曰先生所遇非人殆元君幻化以拯之
也少時常夢身居江心古寺中自顧儼然頭陀後登焦山海西
庵宛如夢境則先生之根器可知矣交游半天下凡名流才士
以及方外黃冠通一藝者靡不欵接同時鉅公長德陶文毅公

外如潘榕皋韓桂舲張芥航陳芝楣梁芷林諸大老先生或以
尊行或以上官率忘形爾汝傾倒特至先生自視若閒雲野鶴翺
翔其間勿以形迹拘也所為詩元本風雅胎息於杜出入於韓
蘇撫時感事有為而作者居多不屑於締章繪句魚工駢體
律賦官翰林時恭遇 仁宗五旬萬壽進呈擬唐賦十首選入
皇清文穎續編洵儒臣榮遇也其言經濟者亦選入 皇朝
經世文編並沈氏昭代叢書精鑿古工八法藏弃既多臨撫入
化頗得海岳華亭兩家神髓求書者無虛日有句云退筆如山
了無謂老年惟覺苦筋骸自嘲亦紀實也所著詩古文辭律賦
試帖制藝書畫錄凡百餘卷梓行於世又倩錢梅溪雙鉤松雪
墨蹟上石尤為藝林所寶貴云先生與霽青太守同出陳玉方
先生之門嘗語霽青太守曰漢儒之經非宋儒之理則不明宋
儒之理非漢儒之經則不實又曰窮經將以致用無用之學非
學也先生之持論如此可以覘所學已卒於道光辛丑六月二
十五日享年六十有八葬於溧陽戴埠鎮馬墩橋配余恭人生
子二學變殤學表府知事繼配陳恭人生子五學箕學斗皆典
史學轍學經參將學楞從九品孫三功成縣丞功炎功實曾孫
一成鼈學表曰先公見背之前一日猶手寫藏書目錄校勘雙
鈎墨蹟初無所謂疾病也半月以前即夢芝楣先生遣价持書
延請醒而以告家人至二十五日遂棄養嗚呼痛哉學表雖老

猶將重刊先公詩文集以廣其傳不知天假之緣否濬頤聞學
表之言瞿然以興曰先生為通儒為循吏宰金匱八稔廉正愛
民頌聲載道至今六十餘年民之稱齊青天者猶依、如在目
前抑何其去思之久耶迴憶昔年先大夫數、道先生並言長
公子之孝實為世所罕觀今乃益信正月既為先大夫先母作
阡表而學表不以為不文復有表墓之請因思吾兩人並皆衰
朽追維先德徒切闡揚以君明發之懷增吾風木之感不禁潸
潸然淚和墨墮也

贈知府銜候選知縣劉君墓表

山陰劉念臺先生之後裔有遷居吾郡臨淮鄉者字曰驗夫以
佐幕於斯遂家焉是為君之曾祖諱永清者為君之祖舉茂才
蚤世祖妣氏胡守節撫孤諱文鰲者為君之考妣氏莊奉姑以
孝聞君諱景華字松泉嘉慶二十一年六月二十一日生性至
孝幼而岐嶷讀書目數行下十歲能文家貧夜無膏火炷香照
字或至曉不輟年十九府試冠軍旋補弟子員食餼丁父艱踰
兩載更遭祖妣之喪經營窀穸生計日蹙不得已出幕於皖案
牘之暇習制舉業兼治詩古文辭工八法傳方伯繼勲恆推重
之好施予鄉人某喪其親貧無以殮將鬻其妻君聞之傾囊飲

助得免道光二十六年丙午鄉試中副車已酉壬子薦而不售
就六安幕以道遠迎養母氏咸豐三年粵寇犯吾皖君奮然有
投筆請纓之志四年六安陷於賊君奉母避兵武陟山時州牧
茅君念劬與孝廉今山東方伯李君元華謀起鄉兵為規復計
稔君才聘參軍事以母病不忍遠離致書茅刺史為畫方略連
下英霍二邑當事者將上聞君以有老母在未獲躬冒矢石不
尸其功固却之而州之人有倡義籌兵籌餉進攻潛太舒城等
邑者君則典衣以應之日讀孫吳殷、以時事為念兩江總督
馬端敏公方宰合肥與君善共議治兵安民之策往復辨論數
千言洞中機宜巡撫福濟公聽之五年夏丁內艱哀毀骨立喪

奠盡禮自是而從戎之計遂決矣秦軍門定三提滇黔之師圖
下桐城駐梅心驛以禮來聘君携伯子長芬行至軍中獻策連
奪賊壘所向克捷進營於呂亭驛賊以大隊來攻相持十九日
直歲大旱軍無糧士卒煮草以食危在旦夕軍門集賓僚商進
止僉曰事急矣不退且不支君曰今援兵不至而大敵當前退
則為所乘無噍類矣夫兵以氣壯將以心堅賊雖多而心不固
勝則聚敗則散易與耳我以孤軍與抗歷十九晝夜而士無懈
志此其機大可用且我軍久饑而敵糧在望若厚賞死士曉以
因糧於敵之義使人自為戰可以轉危為安也軍門然之亟趣
戰賊大潰追奔三十里獲米千餘石斬馘數百營於近桐之五

里拐福濟公聞於朝以知縣用七年二月賊勢益衰軍門謂
君曰城旦夕可復君之抱負克舒已君則感激知遇督攻益急
亡何踞皖賊首偽忠王李秀成以二十萬衆來援絕我軍餉道
士困且饑而賊勢轉張君竟於初二日督隊與賊戰於板瓮嶺
力竭死之年四十有二長芬亦以身殉父端敏入告奉旨贈
知府銜從優議卹給雲騎尉世職入祀昭忠祠君配曹恭人孝
事翁姑治家勤儉生子三人長芬長蔚長英女二人予與君同
郡初不識君仲子長蔚有才名能世其家吳小軒軍門延之
入幕親賊氛掃盪足慰其先人在天之靈願深痛畧革無從忠
骨淪於草莽忽廿年之久將葬其衣冠介小軒以狀抵予乞
為文表之予讀史至明季竊歎念臺先生以誠教人以忠殉國
實為第一流人物書於本傳之後言之不盡且長言之而不意
二百年後純儒名臣之子孫以書生殺賊致命疆場之又有其
人也嗚呼先生之遺澤孔長也已

曾文正公祠安主祝文

維我相侯功在社稷哀榮備至式隆廟食矧茲淮海利資廣斥
變而通之民飽其德遺愛弗諼萬口如一祀事孔明歲時不忒
金陵下游控制兩江黃巾蔓延豕寔鷓鴣張帷幄運籌我武維揚
指麾巾扇埽蕩欃槍大難削平百廢具舉先理漕河繼及鹽監
易網為粟招徠良賈豫章楚皖循環得所東南既定命治畿
輔不才筮醮量移茲土率由舊章罔敢越矩自公北上民多去
思人有所欲天必從之鴻飛遵渚我公歸兮雙旌南下歡動旌
倪昔在玉堂珥筆追隨花輒學步親炙光儀今依節鉞猥辱青
垂凡所咨白首肯不疑方期霖雨永溥四瀆胡天不弔騎箕太

連 詔允建祠康山之麓棟宇既新虔饗栗木公神有憑公為
民福以安以侑俾遂尸祝哉、衡岳渺、瀟湘巨浸東流下匯
淮揚溯洄從之嗚呼不忘千秋萬年其澤孔長敬獻粢牲敬陳
酒漿公靈來格歆此薦薌尚饗

鹽宗廟安主祝文

食重太羹飲先明水祭必齋如反所自始維我賢侯炎帝之臣
肇制鹽鹽以育萬民揚州之域海濱廣斥載在禹貢成賦咸則
束雪量珠比戶所需飲和食德敢忘權輿蠶祀西陵農祀后稷
淡食勿憂我侯功匹奉為鹽宗山右解池寰宇有記祖述攸宜
往者喬公曾舉斯祀海陵城中雲車戾止迺新廟貌康山之前
祐我商賈利溥懋遷誰其配之曰膠曰管王佐霸佐功高民顯
斲木為主神所式憑爰修祀事仲秋良辰豫章楚皖我侯降福
俎豆馨香用遂尸祝禮經垂訓崇德報功明禋永薦敢達神聰
尚饗

祭曾文正公祝文

維我相侯鍾靈衡嶽武達文通根於所學天生偉人秉鈞當軸
大難削平東南之福公初釋褐望重蓬山聯翩藻翰翔步花甌
受知詞賦不次超遷容臺晉秩忠謹回天抗疏伏蒲明堂講席
遙駕鋒車慎持玉尺金馬之庭蠶叢之域出則囊書歸而草檄
如何桂管歟射欃槍蔓延不治遂及湖湘爰斬荆棘以捍梓桑
奮然投筆一旅勤王公之過人堅忍不拔公之有容大度豁達
公之選將闕虜衝突公之臨民慈祥惻怛撫綏八皖戡定三吳
膚功元老經世宏儒酬庸圭爵贊翊璿樞久居戎帳口不言功
展布敷施下逮鹽監變而通之各得其所寓網於粟式絜夫矩

大災大役事靡弗舉曰漢武鄉曰明新建堪與頡頏上膺寵眷
矧在兩淮因利乘便擬諸古人夫唯劉晏去思長繫廟食允宜
康山之麓特起崇祠 朝廷恩渥寰宇名垂雲車風馬瞬息若
馳時維仲春涓吉云祀列俎陳籩割牲薦醴佑我牢盆咸歌盈
止來格來歆迓庥錫祉尚饗

弔李筱峯太守文

嗟天道之難知兮固渺茫而不可憑既降祥降殃之無或爽兮
奚乃厄夫善人君銜恤而將歸兮予敏以度嶺之辰君曰江路
迂迴兮又中間夫山行虞資斧之匱乏兮願附番舶以過征予
曰風波易起兮矧扶櫬而伶仃君曰航海至速兮奚憚艱辛予
終以為不可兮再三止君：曠：而予廩：兮泥成說以勿更
君告予曰無恐兮記連佳者最有名涉鯨濤如平地兮予聞之
而口弗應君掉舟於黃浦兮予稅駕於金陵陡傳南澳之變兮
云觸礁而遽沈怪君弗聽予言兮冀君僮遇救而得生僉曰君
不至此兮為有孝子而喪其身初聞母匯登岸兮果陽侯之降

靈繼聞君拯於魚艇兮得諸申報之所云願久焉消息斷絕兮
不禁老淚之縱橫船存與存船亡與亡兮君奮然以身殉親見
父之死聳身入海兮孝哉君子培清同舟之人十四兮出險者
乃履香谷孟庠君捐軀以隨母兮直抵海濱曹娥負屍同其烈
兮信哉軼羣而邁倫君才槃、兮君貌恂、君胸浩、兮君腹
便、君翁與予齊年兮忝結文字之因相隨七稔兮予則知君
最深予倚君幹練兮解牢盆之紛紜予賴君果斷兮嚴衢市之
邏巡予委君以浚河兮既畚揭之克勤予任君以課桑兮復董
勸之孔殷予有所疑決於君兮君弗以偽亂真君有所見白諸
予兮予遂由昏得明繫予困君於一隅兮惟君識予之性情君
不忍舍予以去兮甘偃蹇而遭迍予冀君歸葬再出兮家於邗
水之濱胡一別而竟成永訣兮怨彼蒼之不仁以斯人而罹此
慘酷兮雖行道皆為之痛心悵招魂於何所兮驚瀕洞而駭淵
齋亂曰龍伯太虐顯奇孝兮雖死猶生秉懿好兮名達天閭三
帥入告兮佇荷褒旌 恩頌 鸞誥兮神返玉京巫陽下召兮
莞、諸孤兮共撫之戚鄰友朋兮義難辭仰天問君兮知不知
雲車風馬兮翩然來降於斯

...

...

...


...

...

...

...

...



...

國



書